

成唯識論音響補遺卷第十之一 誠八

清武林蓮居紹覺大師音義

新伊大師合響

法嗣智素補遺

○次結屬二障二初正結二障攝

誠八

此十一障二障所攝

○次明二障斷義二初斷種現位二初正

釋二初煩惱障

煩惱障中見所斷種於極喜地見道初斷彼障現起地前已伏修所斷種金剛喻定現在前時一切頓斷彼障現起地前漸伏初地以上能頓伏盡令永不行如阿羅漢由故意力前七地中雖暫現起而不為失八地以上畢竟不行

音義 先明見斷極喜地初心斷者即異生性

中一分彼障現起地前已伏者謂資糧加行位也修所斷下次明修斷清涼釋曰直觀論文初地已上能頓伏盡修惑現行如阿羅漢諸漏已盡無復煩惱次云由故意力七地之中雖暫現起而不為失自是一段通於妨難謂有問曰既如阿羅漢令永不行如何前曰猶起我見七地已前猶起貪瞋等耶答云由故意力起謂六地之前容有出觀尚有誤起七地之中常在無相為化衆生故意現起而不為失八地已上畢竟不行者道力勝故

○次所知障

所知障中見所斷種於極喜地見道初斷彼障現起地前已伏修所斷種於十地中漸次斷滅金剛喻定現在前時方永斷盡彼障現

起地前漸伏乃至十地方永斷盡八地以上
六識俱者不復現行無漏觀心及果相續能
違彼故第七俱者猶可現行法空智果起位
方伏前五轉識設未轉依無漏伏故障不現
起

音義 先明見斷若種若現義同煩惱修所斷
下次明修斷若種若現亦即前說十一障
中所明俱生一分八地以上下復約後三
地以明諸識相應所知有現不現無漏觀
心者第六識心果相續者生空智果能違
彼者謂八地已去生空智果及所依心王
以皆轉成無漏與同聚所知障相違所以
不復現行第七識法我見等四種現起以
微細故八地已上猶復現行至第十地位
中法空智果起方乃伏盡前五識俱法貪

誠八

二

瞋癡三種所知八地已上雖未轉依爲第
六無漏觀心之所伏故亦不現起

○次釋妨

雖於修道十地位中皆不斷滅煩惱障種而
彼麤重亦漸斷滅由斯故說二障麤重一一
皆有三位斷義雖諸位中皆斷麤重而三位
顯是故偏說

音義 問曰十地位中於煩惱障但伏不斷何
故前三修習位中俱斷二障及彼麤重答
云雖於修道等此中麤重唯指無堪任性
三位者一見道位二不動地三佛地問諸
位皆斷何獨三位答三位顯故偏說
合 清涼鈔第二之一云解深密經說三麤
響 重一者在皮初地即斷二者在膚八地方
斷三者在骨唯佛地斷雖則餘位亦斷麤

誠八

三

重而三位顯是故偏說初地捨凡入聖位
故八地無漏常相續故佛地果滿頓得捨
故文

○次斷種漸頓二初微

斷二障種漸頓云何

○次釋二初釋所斷障二初第七識俱二障種

第七識俱煩惱障種三乘將得無學果時一剎那中三界頓斷所知障種將成佛時一剎那中一切頓斷任運內起無麤細故

音義無學者謂阿羅漢獨覺如來不言八地已上者未斷此種故任運內起無麤細者釋俱頓斷義謂此識俱見等唯執第八以爲自內實我實法不緣於外故無麤細無麤細故所以頓斷

○次餘六識俱二障種二初煩惱障種

餘六識俱煩惱障種見所斷者三乘見位真見道中一切頓斷修所斷者隨其所應一類二乘三界九地一一漸次九品別斷一類二乘三界九地合爲一聚九品別斷菩薩要起金剛喻定一剎那中三界頓斷

音義先明見斷謂第六識中分別起種三乘見位一切頓斷修所下次明修斷三乘斷有漸頓故曰隨應一一漸次九品別斷者謂有一類鈍根二乘約七生斷將三界九地每地分九品預流果人斷欲界思惑至第五品名一來向斷第六品名一來果以有三品餘惑還來人間故若斷至八品名不還向斷盡九品名不還果以欲界惑盡不生人間故不還果寄生淨居復斷上八

地各九品惑至七十一品名阿羅漢向斷盡後品證羅漢果復有一類利根二乘於九地惑合爲一聚共爲九品雖有九品一生別斷不待七生故若上根者頓斷九品若中根者先斷上三品次斷中三品次斷後三品若軟根者九品一一別斷先斷上品次斷上中品乃至最後斷下下品等其類不一廣如他處故經云預流果人有一生得阿羅漢者有二生五生乃至七生得阿羅漢道者即其義也菩薩下次菩薩可知

○次所知障種

所知障種初地初心頓斷一切見所斷者修所斷者後於十地修道位中漸次而斷乃至正起金剛喻定一剎那中方皆斷盡通緣內

第八

五

外麤細境生品類差別有衆多故

音 義 先明見斷謂六識俱分別而起所知障種非關二乘唯在菩薩初地初心見道中斷若修斷者不同煩惱三界頓斷要於修道十地位中漸次而斷斷盡此種在金剛定何以漸斷謂六識俱者通緣內外麤細境生品類差別有衆多故

○次明能斷道

二乘鈍根漸斷障時必各別起無間解脫加行勝進或別或總菩薩利根漸斷障位非要別起無間解脫利那利那能斷證故加行等四利那利那前後相望皆容具有

音 義 准古通釋加行等四道別義云加行道者謂引無間道前之加行也無間道者謂斷惑也解脫道者無間道後名解脫道謂

已解脫所應斷障最初所生勝進道者除前三外所餘諸道漸勝進故即解脫道後所起諸道也是涅槃路故名爲道文中言二乘漸斷障者唯依斷七轉識中俱生煩惱障說加行勝進或總或別者總則俱時別分前後或前位勝進即後位無間之加行故名爲總望前前之加行優劣實殊故目曰別或前之勝進不能引起後之無苦薩漸斷障者唯約斷七識中俱生所知障說不同二乘剎那剎那四道皆有即有間曰經無量劫佛果乃成時既淹久云何言剎那剎那能斷證耶古師答曰此義不然時經長遠唯分別故如有頌曰處夢謂經年覺乃須臾頃過時雖無量攝在一剎那又曰菩薩精進極熾盛故雖經久劫而謂

少時如有頌云愚修雖少時怠心疑已久佛於無量劫勤勇謂須臾

合集論第五卷云云何加行道謂由此道

能捨煩惱是名修道中加行道云何無間

道謂由此道無間永斷煩惱令無所餘云

何解脫道謂由此道證斷煩惱所得解脫

云何勝進道謂爲斷餘品煩惱所有加行

無間解脫道是名勝進道又復棄捨斷煩

惱加行或勤方便思惟諸法或勤方便安

住諸法或進修餘三摩鉢底諸所有道名

勝進道又爲引發勝品功德或復安住諸

所有道名勝進道文

○四釋證十真如二初標

十真如者

○次釋二初正釋義十初徧行真如

一徧行真如謂此真如二空所顯無有一法而不在故

音謂初地中所證法界名徧行義即是斷異生性障所顯一分之真理也

合清涼鈔三十四之四云由斷前障證徧

行真如謂此真如二空所顯無有一法而

不在故梁攝論中名為徧滿徧滿一切有

為行故意明無有一法非二空故此地最

初徧證徧滿鈔云謂有難言下之九如豈

不徧耶豈復非是二空所顯故為此通意

明徧行之如是如總相下之九如隨德別

立今當初得得於總相以受別名

文

○二最勝真如

二最勝真如謂此真如具無邊德於一切法最為勝故

音第二地中所證法界名最勝義無能測量不可比對遠離邪行犯戒垢故如智論云大惡病中戒為良藥大怖畏中戒為守護死愚闇中戒為明燈於惡道中戒為猛將死海水中戒為大船即最勝義

合清涼疏三十五之一云此亦由翻破戒

之失為無邊德鈔云由具戒故證最勝如

謂此如理最為勝故如說離欲名為最勝

○三勝流真如

三勝流真如謂此真如所流教法於餘教法

極為勝故

音第三地中所證法界名勝流義謂第三

地斷闇鈍障於法無礙為眾法眼由得三

慧照大乘故真如所流教法於餘勝者梁

攝論釋曰從真如流出正體智正智流出

後得智後得流出大悲心大悲流出十二部經名爲勝流真如若餘教法非證真如之所流出所以非勝

合 玄談第七卷引古疏云由此地中得於

三慧照大乘法觀此法教根本真如名勝流真如或證此如說法勝故文會玄第十

三卷云彼釋有二意初約所流教釋由此

地中者即第三地名發光地也論云成就

勝定大法總持能發無邊妙慧光故云三

慧照大乘法也觀此教法根本名勝流真

如者約三慧觀教法根本名爲勝流真如

此逆推本也或證此如下二約所說法釋

以此地菩薩證此真如得說法勝由本勝

故末亦勝也勝流之真如皆依主釋初約

所流教法以彰名後約所說勝法以彰名

誠八

八

也又云謂有問言彼宗真如凝然何有流義故疏云彼宗雖不立真如隨緣而說佛正體智證最清淨法界而於後得安立教法名爲如流

○四無攝受真如

四無攝受真如謂此真如無所繫屬非我執等所依取故

音 第四地中所證法界名無攝義謂第四

地斷微細煩惱障所證真如非色心有無等法所繫屬故亦非我執我慢我愛無明

誠八

九

邊見我所等所依所取故

○五類無別真如

五類無別真如謂此真如類無差別非如眼等類有異故

音 第五地中所證法界名類無別謂第五

地斷下乘般涅槃障所證真如畢竟無盡
無有變易故生死涅槃二皆平等故無差別

合清涼鈔三十六之二引攝論云名為相

續無差別法世親釋云謂於此中體無有

異非如眼等隨諸有情相續差別各各有

異無性意同而梁論云由此法界能令三

世諸佛相續身不異者衆生迷此萬類之

異諸佛證此居然不變文

○六無染淨真如

六無染淨真如謂此真如本性無染亦不可

說後方淨故

音第六地中所證法界名無染淨謂第六

地斷麤相現行障故證得真如觀十二因

緣知緣起法無染無淨非謂如也由真如

故法無染淨名此真如為無染淨

合會玄第十一卷云依辯中邊論菩薩因

證此真如於諸法上得無染淨所證真如

從此彰名若唯識論即當體彰名真如隨

障不染隨智不淨如玉性潔泥不能染也

文

○七法無別真如

七法無別真如謂此真如雖多教法種種安

立而無異故

音第七地中所證法界名法無別謂第七

地斷細相現行障所證真如古疏云雖諸

教法依如建立如無異故又於教中立種

種名法界實相等而如無異

合會玄云依唯識說法即能詮教法無別

即所詮真如真如不隨能詮教法而有差

別故若辯中邊論菩薩證此真如已得妙
無相道能達諸教法體差別故立其名

文

○八不增減真如

八不增減真如謂此真如離增減執不隨淨
染有增減故即此亦名相土自在所依真如
謂若證得此真如已現相現土俱自在故

義音第八地中所證法界名不增減謂第八

地斷無相中作加行障所證真如雜染滅
時而無有滅清淨增時而無有增故曰離
增減執如中邊論云由通達此圓滿證得
無生法忍於諸清淨雜染法中不見一法
有增有減即此亦名相土自在所依真如
者攝論釋曰謂此法界是相自在之所依
止於諸相中而得自在名相自在隨所欲
相即現前故土自在者謂此法界是土自

說八

十二

在之所依止於所現土而得自在名土自
在如欲令土成金寶等隨意成故釋曰相
約現身土約現界

○九智自在所依真如

九智自在所依真如謂若證得此真如已於
無礙解得自在故

義音第九地中所證法界名智自在謂第九

地斷利他不欲行障所證真如是智自在
之所依止故能於人天衆中以四種無礙
辯才任運自在善說法故

合音清涼鈔三十八之二引無性釋云謂此

地中得無礙解所依止故分證得智波羅
密多於一切法不隨其言善能了知諸意
趣義如實成就一切有情受勝法樂
補會玄云智即能依真如即所依能依之
遺

智證此所依真如已便於四無礙解而得自在

○十業自在所依真如

十業自在等所依真如謂若證得此真如已普於一切神通作業總持定門皆自在故

音義第十地中所證法界名業自在謂第十地斷諸法中未得自在障所證真如爲神通等之所依止所依既勝故神通作業等皆得自在如清涼云住一切地成就一切佛菩薩等即業自在義若廣說者如淨名不思議品及攝論等所明

補遺會玄云業即菩薩事業謂神通陀羅尼及三摩地并身等三業謂此菩薩化作種種利樂有情之事皆悉無滯名爲自在也

○次明立意

誠六

十二

雖真如性實無差別而隨勝德假立十種雖初地中已達一切而能證行猶未圓滿爲令圓滿後後建立

音義問曰真如之理唯一法界體無異殊那有十耶釋曰隨德立名假說十種又問初

地見理已知一切何必依後後位立此十耶釋云初地雖達而能證行猶未圓滿爲令滿行依後後立能證行者即十種波羅密多

合雖真如下清涼疏三十四之三云此約

所證德異故有十地親證鈔引古疏釋云真如實無別隨其所證所生能證勝德假立十種釋曰既云所生能證勝德假立十種蚤有智明昧義矣又疏問地地正證者如初地中正智親證真如則後九地中不

應更證以如無二無異故古德釋云如雖一味約智明昧有十親證此亦順理鈔云應知親證之言但望當地加行後得故名爲親不望後地說爲親證故不相違也雖初地下清涼疏云此則亦約能證明昧義

識八

十三

也鈔云此一段文自明廢立應有問言初地之內不達十如應無發趣之果能達後後相及得果若已通達何不齊證真如十德故今答云達即齊達證行未圓故行位有十故有十種圓滿真如乃至如來十皆能了如辯中邊論廣有分別又疏云如人觀空小時不遠大則漸增空雖無差眼有明昧

文

○次明轉依果二初承前起後

如是菩薩於十地中勇猛修行十種勝行斷

十重障證十真如於二轉依便能證得

○次正釋轉依二初釋轉依位別三初總標

轉依位別略有六種

○次別釋六初損益轉

一損力益能轉謂初二位由習勝解及慚愧故損本識中染種勢力益本識內淨種功能雖未斷障種實證轉依而漸伏現行亦名爲轉

音謂資糧加行二位名損力益能轉依損

力者由此二位依殊勝解及聞熏習損滅依附異熟識中煩惱熏習又由勝解聞熏習故羞恥過惡令諸煩惱少分現行或不現行故云損力益能者即由勝解等力故增益依附異熟識中所習淨法功能故云

益能若爾未斷障種何名轉依故答曰雖未斷障等

補損謂減損力謂勢力益謂增益能謂功
能謂資糧位具四種力修六種行發三種練磨心信解唯識故云習勝解謂加行位起四尋伺發四實智觀二取空欲界人中修此厭心殊勝具有慚愧由此二位熏習勝解慚愧之力便能損染益淨云

○二通達轉

二通達轉謂通達位由見道力通達真如斷分別生二障麤重證得一分真實轉依

音謂見道位名通達轉依以斷異生性障

證得一分真實理故

○三修習轉

三修習轉謂修習位由數修習十地行故漸

試八

十

斷俱生二障麤重漸次證得真實轉依攝大乘中說通達轉在前六地有無相觀通達真俗間雜現前令真非真現不現故說修習轉在後四地純無相觀長時現前勇猛修習斷餘麤重多令非真不顯現故

音先正釋攝大乘下會通攝論通達真俗

者清涼釋曰以有相觀通俗無相觀達真令真非真現不現者入無相觀真現非真不現出觀真不現入有相故非真現後四地多令非真不顯現者常在無相觀故多試八不現由雜煩惱未名清淨則非真猶現故有多言

○四圓滿轉

四果圓滿轉謂究竟位由三大劫阿僧企耶修習無邊難行勝行金剛俞定現在前時永

斷本來一切麤重頓證佛果圓滿轉依窮未來際利樂無盡

音謂究竟名圓滿轉依以三僧祇修行圓滿金剛喻定斷盡麤重從此自利畢功唯是度生盡未來際故名圓滿轉依

○五下劣轉

五下劣轉謂二乘位專求自利厭苦欣寂唯能通達生空真如斷煩惱種證真擇滅無勝堪能名下劣轉

音清涼釋曰此有六義名下劣轉一專求

自利趣小菩提二厭生死苦欣樂涅槃三唯達生空真如四唯斷煩惱障種五唯證真擇滅真擇滅者有餘無餘二種涅槃六無勝堪能此句通該上五句義

○六廣大轉

六廣大轉謂大乘位爲利他故趣大菩提生死涅槃俱無欣厭具能通達二空真如雙斷所知煩惱障種頓證無上菩提涅槃有勝堪能名廣大轉

音翻上六句名廣大轉其義如文

○三簡示

此中意說廣大轉依捨二麤重而證得故

音頌中言捨二麤重故便證得轉依者意說六中廣大轉依非餘五種問何以不取果圓滿轉答對因位說所以不取又約位言不出後二大乘小乘今不取小乘故唯取第六

○次釋轉依義別三初總標轉依義別略有四種

○次別釋四初能轉道二初標

一能轉道此復有二

○次釋二初能伏道

一能伏道謂伏二障隨眠勢力令不引起二障現行此通有漏無漏二道加行根本後得三智隨其所應漸頓伏彼

義八

十六

義清涼釋曰六行伏惑是曰有漏加行漸

伏根本後得能頓伏故

補有漏加行唯能漸伏前云彼障現起地

前漸伏無漏根本後得俱能頓伏前云初

地以上能頓伏盡

○二能斷道二初正釋

二能斷道謂能永斷二障隨眠此道定非有漏加行有漏曾習相執所引未泯相故加行趣求所證所引未成辦故

義此道定非有漏加行者二道除有漏三

義八

十七

智除加行有漏曾習等者釋非有漏有二

義故非有漏道一曾習相執所引二未泯

相故如前文云謂異生類三性心時雖外

起諸業而內恒執我由執我故令六識中

所起施等不能忘相所以有漏非能斷道

加行趣求等者釋非加行所證謂真如所

引謂本智以加行智未能成辦此理智故

非能斷道

○次料簡二初師有斷無斷者

有義根本無分別智親證二空所顯真理無

境相故能斷隨眠後得不然故非斷道

義此師意取根本智為能斷道非後得者

不能親證真如變相觀故

○次師二智俱有斷

有義後得無分別智雖不親證二空真理無

力能斷迷理隨眠而於安立非安立相明了
現前無倒證故亦能永斷迷事隨眠故瑜伽
說修道位中有出世斷道世出世斷道無純
世間道能永害隨眠是曾習故相執引故由
斯理趣諸見所斷及修所斷迷理隨眠唯有
根本無分別智親證理故能正斷彼餘修所
斷迷事隨眠根本後得俱能正斷

音義 先正釋後得亦名能斷故瑜伽下引證
出世斷道謂根本智世出世斷道謂本後
二智純世間道者即有漏加行也由斯下

結示

合 會玄第十卷云後得智不斷者不能斷
迷理隨眠不親證理故而於安立四諦之
理無顛倒證知體是依他故但斷迷事隨
眠彼疏云迷理隨眠行相深遠要證彼理

方能斷之迷事隨眠行相淺近雖有相觀
亦能斷之准百法鈔問後得智能斷惑者
未審能斷何惑答慈恩有二解一云但約
二乘後得智能斷俱生中迷事隨眠不約
菩薩說也即顯煩惱通本後二智能斷若

所知障唯根本智斷二云菩薩後得智亦
能斷所知障所知障中有迷理迷事迷理
執故難斷唯根本斷若迷事非執易斷後
得亦能斷故瑜伽下會玄釋曰此護法引
瑜伽出世斷道證根本智斷迷理隨眠引

誠八

十六

世出世斷道雙證根本後得斷迷事隨眠
世出世者揀純世間故意言是世之出世
故云世出世此約修道位中云迷事惑目
之曰世揀純世間復云出世此斷道既通
二智故引爲證或可此迷事是後得所斷

道曰世亦是根本所斷道故復云出世也

補遺開蒙云能斷道謂無分別根後二智斷

迷理事根隨惑故名能斷道迷理迷事隨

眠者清涼云眠伏藏識隨緣纏繞迷事理

境故立二名體即二障種子

論八

十九

○二所轉依二初標

二所轉依此復有二

○次釋二初持種依

一持種依謂根本識由此能持染淨法種與

染淨法俱爲所依聖道轉令捨染得淨餘依

他起性雖亦是依而不能持種故此不說

音義聖道轉令捨染得淨者謂地上菩薩修

聖道時轉捨依止本識染分依他轉得依

附本識淨分依他故持種識有轉依義問

前七識等並依他起亦聖所依法何非轉

依釋意如文

補遺清涼曰謂在因中雙持染淨今得聖道

捨染得淨即名轉依

○二迷悟依

二迷悟依謂真如中此能作迷悟根本諸染

淨法依之得生聖道轉令捨染得淨餘雖亦

作迷悟法依而非根本故此不說

音義真如謂迷悟依者真如即是諸法實性

在纏爲迷出纏爲悟迷時則染法依之而

起悟時則淨法由是而生聖道起時捨染

得淨是以真如有轉依義問餘依他起亦

迷悟依此何不說故答云

補遺宗鏡云雖說迷悟依非即心境持種以

真如不變不隨於心變萬境故但是所迷

耳後還淨時非即攝相即真如故但是所

悟耳

○三所轉捨二初標

二所轉捨此復有二

○次釋二初所斷捨

一所斷捨謂二障種真無間道現在前時障治相違彼便斷滅永不成就說之爲捨彼種斷故不復現行妄執我法所執我法不對妄情亦說爲捨由此名捨徧計所執

音義障治相違者真無間道是能治智二障

種子是所治惑猶明與闇勢不並生故曰

彼便斷滅上明斷種名捨彼種斷故下次

顯伏現名捨清涼釋曰實我實法自性本

無但對妄情妄似於有今妄情斷無境對

心假說此境亦名爲斷由此道理名捨所

執諸有處言斷徧計者義在於此

識入

補開蒙云所斷捨謂二障種每遇地地無

間道時彼便滅故

○二所棄捨二初正釋

二所棄捨謂餘有漏劣無漏種金剛喻定現在前時引極圓明純淨本識非彼依故皆永

棄捨彼種捨已現有漏法及劣無漏畢竟不

生既永不生亦說爲捨由此名捨生死劣法

音義先明棄種名捨清涼鈔釋曰餘有漏者

即二障餘有漏善法劣無漏種者即十地

中所生現行圓謂圓滿明謂行相分明異

識入

主

於菩薩未圓明故此淨八識非餘有漏劣

無漏依故皆棄捨又鈔云劣無漏者即第

十地中所生現行金剛道中方能捨故二

由未捨白淨無記者即異熟識第八地中

捨賴耶名第十地中猶名異熟識至如來

位方捨異熟名無垢識三由未捨有漏善

法者即與二障種俱其二障種是所斷捨

文彼種捨已下次明現不生名捨開蒙問

所棄捨答爲有漏善異熟無記劣無漏變

易身生死劣法即變易取要只是有漏種

現劣無漏種現至此最後解脫道時盡棄

捨之名四事也文

補遺由此名捨生死劣法一句總結上有漏

種現劣無漏種現四事

○次料簡二初師無間道捨

有義所餘有漏法種及劣無漏金剛喻定現

在前時皆已棄捨與二障種俱時捨故

合清涼釋曰此之有漏及劣無漏與二障

種一時而捨由二障種有此二故文

補遺開蒙云前念金剛心時名無間道斷盡

一切微細二障至第二念棄捨四事

○次師解脫道捨

有義爾時猶未捨彼與無間道不相違故善

薩應無生死法故此位應無所熏識故住無

間道應名佛故後解脫道應無用故由此應

知餘有漏等解脫道起方棄捨之第八淨識

非彼依故

義先申正解謂金剛喻定起時但捨障種

未能捨彼有漏等種何者斷二障時當無

間道此有漏等與無間道不相違故菩薩

應無下以理斥前菩薩應無生死法者謂

無間道時猶是菩薩若言兼捨有漏等種

則此菩薩應無一分變易生死法故此位

應無所熏識者所熏謂異熟識意云有漏

等種亦異熟持要須金剛道後解脫道起

此識方空若謂無間道時已捨所持則能
持異熟亦捨則此位中應無所熏識故若
無間道已捨異熟是則因位菩薩應名佛
故既已名佛起解脫道應無用故言無用
者良以解脫道起有二種用一素^主有漏等
種二證極果真理若謂無間道時已捨諸
種則解脫道應無捨種之用故由此下結
示正釋

成唯識論音響補遺卷第十之一

音釋

淹

衣炎切音關
滯也久留也

企

去冀切
音器

成唯識論音響補遺卷第十之二 誠九

清武林蓮居紹覺大師音義

新伊大師合響

法嗣智素補遺

○四所轉得三初總標

四所轉得此復有二

○次別釋二初所顯得二初總釋所顯得

一所顯得謂大涅槃此雖本來自性清淨而由客障覆令不顯真聖道生斷彼障故令其相顯名得涅槃此依真如離障施設故體即是清淨法界

音義涅槃此云圓寂亦云滅度秦言無爲亦

名安隱義如常釋總之即一真法界也謂

有問曰涅槃自性清淨本然徧周法界聖

凡咸具那言所顯及與得耶故釋云此雖

本來等又問既有障覆令不顯現何名本

淨故答云此依真如等

合會玄第四卷云其涅槃性體是無爲本

來而有自性清淨後逢善友斷障所顯雖

一真如逢緣證別名四涅槃文

○次別明四涅槃三初總標

涅槃義別略有四種

音義涅槃之理殊無二致但以凡聖優劣言之略分四別

之略分四別

○次別釋二初正釋四初本來自性清淨

涅槃

一本來自性清淨涅槃謂一切法相真如理

雖有客染而本性淨具無數量微妙功德無

生無滅湛若虛空一切有情平等共有與一

切法不一不異離一切相一切分別尋思路

絕名言道斷唯真聖者自內所證其性本寂故名涅槃

音義謂一切下釋本性淨義謂即蘊處界等

一切諸法所依之理雖為客塵煩惱所覆如淨明珠處於淤泥其體本淨如經云染而不染難可了知此理不簡聖凡有情平等共有與一切下釋涅槃義此與諸法不一異者異應真如非彼實性一則此性應是無常離一切相一切分別者謂不可以有無等四句言之尋思路絕者顯境名言所不能至名言道斷者表義名言所不能到

補遺開蒙云本性無染謂之清淨本性寂然故曰涅槃佛地論云無始時來自性清淨具足種種過十方界極微塵數性相功德

二

一切名言皆不能得唯是清淨聖智所證二空所顯真如為其自性諸聖分證諸佛圓證

○二有餘依涅槃

二有餘依涅槃謂即真如出煩惱障雖有微苦所依未滅而障永寂故名涅槃

合有餘依涅槃者謂即真如出煩惱障尚有分段生死苦所依故以諸聖者最後苦

身未曾滅故瑜伽云住有餘依墮在衆數猶有衆苦所得轉依猶與六處而共相應

三

衆數者謂五蘊身以有此身有衆苦故問既有衆苦何名涅槃答雖有微苦相應而障永滅亦名涅槃以果縛雖存子縛已盡故既有所依不無還滅何名涅槃開蒙云能招染盡故名涅槃

○三無餘依涅槃

二無餘依涅槃謂即真如出生死苦煩惱既盡餘依亦滅衆苦永寂故名涅槃

音義并滅身智則苦依亦無名無餘依大患

永滅諸苦永寂即涅槃義瑜伽云住無餘依不墮衆數永無衆苦而於六處永不相應

補遺清涼云此有餘無餘通大小乘而說真如爲體即異小乘

○四無住處涅槃

四無住處涅槃謂即真如出所知障大悲般若常所輔翼由斯不住生死涅槃利樂有情窮未來際用而常寂故名涅槃

音義即真如出所知障者意顯煩惱同於二乘故略不說大悲下釋無住義由大悲心

常輔翼故觀諸有情爲三苦所迷沉淪生死以四攝法拔濟含識是故不住涅槃由般若智常輔翼故於念念中斷一切障安住無爲所以不住生死涅槃生死二俱不住故名無住問窮未來際利樂有情即利他之妙用那名涅槃故答曰用而常寂

○次料簡 二初約凡聖通簡

一切有情皆有初一二乘無學各有前三唯我世尊可言具四

○次申問答別簡 五初簡善逝有有餘依

第九

二初問

如何善逝有有餘依

音義此躡上句唯我世尊可言具四意爲問善逝者佛十號中之一問者意云二死已離諸苦永寂名之曰佛寧有微苦所依未

盡之涅槃耶

○次答

雖無實依而現似有或苦依盡說無餘依非苦依在說有餘依是故世尊可言具四

音義答意有二先明示有同於二乘如乳光

經說世尊有疾命阿難索乳療渴即其一事復有金鎗背痛等報諸如是等皆現似有之義或苦下後明以無漏蘊爲有餘依故曰非苦依在如涅槃經云我今此身即是常身法身等

合開蒙云如來之身有餘樂依無漏之身

譬非苦依故名有餘依不同二乘有餘苦依身有屬故問何知無苦答捨無常色獲得常色受想行識亦復如是故知無苦有餘樂依問蘊雖無漏不無遷滅何名涅槃非

減九

五

寂靜故答能招染盡故名涅槃

○二簡二乘容有前三二初問

若聲聞等有無餘依如何有處說彼非有有處說彼都無涅槃豈有餘依彼亦非有

合此躡上文二乘無學容有前三意問也

此有二問初謂聲聞等既有無餘依如何有處云但有有餘依無無餘依此以他處無無餘難此中有也次謂有處云一向都無豈有餘依彼二乘無學亦非有耶此以他處都無難此中有有餘依也

○次答 有兩番初一番二初約圓寂義隱答

次問

然聲聞等身智在時有所知障苦依未盡圓寂義隱說無涅槃非彼實無煩惱障盡所顯真理有餘涅槃

義音謂有處言都無涅槃者依聲聞等身智未滅時說爲有所知障所依苦身未盡故言都無非彼實無煩惱障盡有餘涅槃補遺苦依即果縛也二乘身心正屬所知障

○次約未證無餘答初問

爾時未證無餘圓寂故亦說彼無無餘依非彼後時滅身智已無苦依盡無餘涅槃

義音謂有處言彼無無餘依者即彼聲聞等身智在時猶未證得無餘依故是以言無然彼後時非無生緣已畢化火自焚身智俱泯餘依滅盡之無餘依也

○次一番二初依無住處答次問

或說二乘無涅槃者依無住處不依前三

義音謂有處說都無涅槃者或依第四無住處涅槃而說非謂前三亦說無也

○次約不定性答初問二初正釋不定無餘依

又說彼無無餘依者依不定性二乘而說彼纔證得有餘涅槃決定回心求無上覺由定願力留身久住非如一類入無餘依

義音或說二乘無無餘依者依不定性聲聞等說彼纔證得小果即發大心留身久住行菩薩道非如一類定性二乘唯取小果永入無餘故說二乘無無餘依

○次轉釋一類有無餘依二初正釋有無餘

謂有二乘深樂圓寂得生空觀親證真如永滅感生煩惱障盡顯依真理有餘涅槃彼能感生煩惱盡故後有異熟無由更生現苦所依任運滅位餘有爲法既無所依與彼苦依

同時頓捨顯依真理無餘涅槃爾時雖無二
乘身智而由彼證可說彼有

音義

問曰上言一類入無餘依者意復云何

釋云謂有二乘等深樂圓寂者畏生死苦
但念空無相無作故現苦所依任運滅者

疏九

七

謂現在身是過業所感業既漸盡則果報
身亦任運滅故餘有為法謂二乘觀智及
相應心品此等既無所依與彼苦依同時
頓捨便證無餘問苦依與智既同時捨無
餘真理誰為能證答入無餘時雖無身智
然先由彼身智證得故可假說彼有耳

○次對佛辯同異

此位唯有清淨真如離相湛然寂滅安樂依
斯說彼與佛無差但無菩提利樂他業故復
說彼與佛有異

合問既證無餘便與佛等何故二乘與佛

有異答此位既斷煩惱證得清淨真如離
分別想得寂滅樂依斯義故與佛無差然
上不求菩提下不度衆生因乖萬行果缺
圓常故復說彼有異於佛如有經云法性
真常離心念二乘於此亦能得不以此故
為世尊但以甚深無礙智即斯義也

○三簡斷所知得無住處 二初問

諸所知障既不感生如何斷彼得無住處

音義躡上問起意云感後有生由煩惱障故

斷彼障得二涅槃然所知障既非感生如
何斷彼亦得無住處涅槃耶

○次答

彼能隱覆法空真如令不發生大悲般若窮
未來際利樂有情故斷彼時顯法空理此理

即是無住涅槃令於二邊俱不住故

音義 答意云所知雖不感生然能障於法空

真理亦能障於利樂他業斷此障故顯法
空理此所顯者即是不住二邊之妙涅槃
理所以斷彼時得無住處

○四簡斷所知不得擇滅二初正簡二初

問

若所知障亦障涅槃如何斷彼不得擇滅

音義 此亦躡前意問謂若所知既障無住涅槃

真理是則斷彼應得擇滅無為以擇滅

智斷一分障顯一分理故

○次答

擇滅離縛彼非縛故

音義 答曰擇滅無為是離煩惱障縛所顯彼

所知障既不感生非同煩惱能縛有情住

誠九

於生死故斷彼時不得擇滅但證真如無

為耳

○次釋難二初難

既爾斷彼寧得涅槃

音義 謂所知障既非縛故如何斷彼亦得無

住涅槃

○次釋二初明無住非滅縛得故非擇滅

攝二初正釋

非諸涅槃皆擇滅攝不爾性淨應非涅槃能

縛有情住生死者斷此說得擇滅無為諸所

誠九

九

知障不感生死非如煩惱能縛有情故斷彼

時不得擇滅然斷彼故法空理顯此理相寂

說為涅槃非此涅槃擇滅為性故四圓寂諸

無為中初後即真如中二擇滅攝

音義 先泛明所攝義別謂前所明四種涅槃

有是擇滅有非擇滅非彼四種皆擇滅攝
若謂皆屬擇滅攝者是則四中初一應非
涅槃以性淨理原非斷障之所得故能縛
下正明無住非擇滅攝煩惱是縛擇滅離
縛故斷彼時證真擇滅所知非縛但障大
悲及法空理故斷彼時不得擇滅問既斷
所知不得擇滅何名涅槃答然由斷彼所
知得顯法空真理此法空理本來寂滅故
說涅槃非此涅槃以擇滅為性也故四下
結示可知

○次釋難二初約不動等二難唯斷縛得
擇滅

若唯斷縛得擇滅者不動等二四中誰攝
音義上句牒定前義下句正問不動等二者
等於想受滅謂不動想受滅二種無為望

餘四無為中誰所攝耶

○次約暫離釋不動等二非擇滅攝

非擇滅攝說暫離故擇滅無為唯究竟滅有
非擇滅非永滅故

補遺入第四禪名為不動入滅盡定名受想

滅此二說是暫離有似緣闕不生之非擇
滅義故曰說暫離故非擇滅攝何以不屬
擇滅以擇滅無為唯究竟滅故有非擇滅
非永滅者釋上暫離義謂擇滅有二種如
第二卷中釋擇滅無為云不由擇力本性
清淨或緣闕所顯故名非擇滅苦樂受滅
故名不動想受不行名想受滅故不動等
二乃是緣闕所顯之非擇滅以非永滅故
非是本性清淨之非擇滅以本性清淨是
永滅故不動等緣闕所顯之義應檢開蒙

六無爲章

○次明無住是滅障得故亦擇滅攝三初

正立

或無住處亦擇滅攝由真擇力滅障得故

音義或無住處亦擇滅攝者由法空觀智真

擇滅力斷所知障而證得故

○次釋成

擇滅有二一滅縛得謂斷惑生煩惱得者二

滅障得謂斷餘障而證得者

音義又恐難云前言無住非擇滅攝此云亦

擇滅攝前後二說其旨云何故釋云擇滅

有二等意明前約離縛所得擇滅故說擇

滅不攝無住此依滅障所得擇滅故說擇

滅亦攝無住

○三結示

疏九

十二

故四圓寂諸無爲中初一即真如後三皆擇滅不動等二暫伏滅者非擇滅攝究竟滅者擇滅所攝

音義先正結初一即真如者由性淨涅槃不

依決擇而證得故不屬擇滅次不動下例

前釋難義結不動等二暫伏滅者成實論

曰二乘那含果及菩薩遠行地前所入捨

念清淨三昧及滅盡定由俱生煩惱未永

斷伏故名暫伏滅究竟滅者即是三乘無

學果所入二定由永斷伏俱生煩惱障故

名究竟滅

○五簡所知障亦障涅槃二初問

既所知障亦障涅槃如何但說是菩提障

音義意云所知障既障無住涅槃如何聖教

但說是智障不言障涅槃耶

○次答

說煩惱障但障涅槃豈彼不能為菩提障應知聖教依勝用說理實俱能通障二果

音義理實俱能通障二果然諸聖教依勝用說各別障一是故於此不應為難

○三簡示

如是所說四涅槃中唯後三種名所顯得

音義初一非所顯得者以自性清淨涅槃不由斷障所顯得故

○次所生得 二初正釋 二初總明所生得

二所生得謂大菩提此雖本來有能生種而所知障礙故不生由聖道力斷彼障故令從種起名得菩提起已相續窮未來際此即四智相應心品

音義簡非二乘所證名大菩提從無漏種生

因所生名所生得問曰無漏種子法爾而有自種而生那名得耶釋意可知

今會之第四卷云菩提體是有為本有種子多聞熏習因修增長體即四智文開蒙

云轉滅有漏八識之時從無漏種生起四

智名所生得

○次別釋四智品 一初徵

云何四智相應心品

音義相應心品者異類合成一聚名品即八淨識及餘信善心所也

○次釋 二初正釋智品 一初別釋體相四

初大圓鏡智相應心品

一大圓鏡智相應心品謂此心品離諸分別所緣行相微細難知不妄不愚一切境相性相清淨離諸雜染純淨圓德現種依持能現

能生身土智影無間無斷窮未來際如大圓鏡現衆色像

音義謂此心品離諸分別者由因中無計度

故所緣行相微細難知者由因中行相窮極微細難可了知及此所緣內外境亦微

藏九

十三

細難測故不妄不愚一切境相者由因中

能緣三類性境不差謬故性相清淨者因

中相染而性淨今智光發明性相俱淨故

純淨圓德者純者無雜淨即離染圓者滿

義現種依持者現行功德之依種子功德

之持自性明善名爲清淨有漏永亡云離

諸雜染此能現生自受用等三身三土及

後三智如大圓鏡現衆色之影像

補遺會玄云鏡智離分別故依持平等所緣

行相亦不可知於真俗境如實了知不妄

不愚云

○二平等性智相應心品

一平等性智相應心品謂此心品觀一切法

自他有情悉皆平等大慈悲等恒共相應隨

諸有情所樂示現受用身土影像差別妙觀

察智不共所依無住涅槃之所建立 味相

續窮未來際

音義自他有情悉平等者由昔因中執有我

故自他不等今我執既無故皆平等諸有

情者謂十地菩薩也妙觀察智不共所依

者因中第七識爲第六識不共所依果上

平智亦爲妙觀察智之所依故無住涅槃

之所建立者由悲與智恒相應故一味者

一無漏味也餘義可知

○三妙觀察智相應心品

三妙觀察智相應心品謂此心品善觀諸法
自相共相無礙而轉攝觀無量總持之門及
所發生功德環寶於大衆會能現無邊作用
差別皆得自在雨大法雨斷一切疑令諸有
情皆獲利樂

法九

十四

音義清涼釋曰神用無方稱之曰妙緣自共
相名為察智自即色心等別共即同無常
等又攝論云圓成實性為共相依他起性
為自相攝觀者攝即攝藏觀即觀察六度
道品為功德實諸神通等為作用差別謂
以現相或放光等

○四成所作智相應心品

四成所作智相應心品謂此心品為欲利樂
諸有情故普於十方示現種種變化三業成
本願力所應作事

音義示現種種變化三業者准佛地經釋曰

由是如來勤身化業示現種種工巧等處
摧伏諸技傲慢衆生以是善巧方便力故
引諸衆生令入聖教成熟解脫由是如來
變語化業宣揚種種隨所樂法文義巧妙
小智衆生初聞尚信以是善巧方便力故
引諸衆生令入聖教成熟解脫由是如來
決意化業決擇衆生八萬四千心行差別
以是善巧方便力故引諸衆生令入聖教
成熟解脫廣如彼經

法九

十五

○次總示立名

如是四智相應心品雖各定有二十二法能
變所變種種現俱生而智用增以智名顯故此
四品總攝佛地一切有為功德皆盡
音義有疑問曰四智心品每品定有二十二

法能所變等云何但以智得名耶故釋云如是四智等二十二法者五徧行五別境信等十一并所依淨識各有二十二法能徧謂內二分所變謂相見分故此四品總攝一切有爲功德盡者謂即由智品定有二十二法故所以四品總攝一切善法以無漏位中智用增盛以智名顯故云四智相應心品佛地論云大覺地中無邊功德略有二種一者有爲二者無爲無爲功德淨法界攝有爲功德四智所攝

○次諸門分別 二初正釋 四初轉得門 三

初師轉識成智

此轉有漏八七六五識相應品如次而得

補遺開蒙問轉何識生何智答轉前五得成

所作六妙觀察七平等性八大圓鏡 文

○次師智依識轉

智雖非識而依識轉識爲主故說轉識得

音義問曰智是心所識是心土已轉未轉其

體原異那言轉識而得四智耶釋云智依

識轉非轉識體然識是心王有主義故說

轉識得

合開蒙問轉識成智智者別境中慧豈不

轉王成心所耶答稱實轉王得王轉所得

所文

○三師轉強得強

識九

六

又有漏位智劣識強無漏位中智強識劣爲

勸有情依智捨識故說轉八識而得此四智

音義清涼釋曰言識劣者以二分中但有淨

故不同衆生分別強故言智強者無惡慧

故決斷勝故

合會玄第十三卷引百法鈔云有漏位中

智劣識強無漏位中智強識劣問何因如是耶答因中識強者爲境強故以識爲了別境而生故問因何境強答爲煩惱強煩惱強者爲智慧劣因此生死輪迴果中智強識劣者爲境劣故境劣者爲煩惱無故煩惱無者爲智強故因此智強能捨生死得涅槃等

○二初起門二初別明四初大圓鏡智

初師無間道時起

大圓鏡智相應心品有義菩薩金剛喻定現在前時即初現起異熟識種與極微細所知障種俱時捨故若圓鏡智爾時未起便無能持淨種識故

○次師解脫道時起

該九

十七

有義此品解脫道時初成佛故乃得初起異熟識種金剛喻定現在前時猶未頓捨與無間道不相違故非障有漏劣無漏法但與佛果定相違故金剛喻定無所熏識無漏不增應成佛故由斯此品從初成佛盡未來際相續不斷持無漏種令不失故

音二釋之中此釋爲正義並見前所棄捨中

○二平等性智

平等性智相應心品菩薩見道初現前位違二執故方得初起後十地中執未斷故有漏等位或有間斷法雲地後與淨第八相依相續盡未來際

音第七因中轉故云見道初起有漏等位或有間斷者謂十地中未能斷盡俱生二

執若第六識入生法觀時觀我法空伏二
執故此智現前若出二觀時與漏心俱則
不現起故言或有至十地後心乃成究竟
無漏以淨第八而爲所依相續無間盡未
來際

合宗鏡第五十七卷問第六能斷惑斷惑
成無漏第七不能斷惑何故亦成無漏答
謂第七識是第六所依根第六是能依識
能依識既成無漏第七所依根亦成無漏
謂第六入生法二空觀時第七識中俱生
我法二執伏令不起故第七成無漏文

○三妙觀察智

妙觀察智相應心品生空觀品二乘見位亦
得初起此後展轉至無學位或至菩薩解行
地終或至上位若非有漏或無心時皆容現

無九

十八

起法空觀品菩薩見位方得初起此後展轉
乃至上位若非有漏生空智果或無心時皆
容現起

音此智亦因中轉通大小乘若生空妙觀
察智於二乘位見道初起至無學位方得
究竟若在菩薩漸悟之者解行地終頓悟
之者要至上位若非有漏或無心時皆容
現起解行地終即加行位上位即初見道
至第八地若非有漏謂非有漏心時或無
心時謂滅盡定意云無漏心時及有心時
方容現起若法空妙觀察智菩薩見道方
得初起展轉乃至上位若非有漏等三時
皆容現起此上位謂十地後心若非有漏
等者有漏與彼相違生空不違法執無心
則無六識故此三時皆不現起

○四成所作智二初師修道位亦起

成所作智相應心品有義菩薩修道位中後得引故亦得初起

合清涼釋曰謂第六意識後得引故於淨

土中起五識故

難九

十九

○次師成佛時初起

有義成佛方得初起以十地中依異熟識所變眼等非無漏故有漏不共必俱同境根發無漏識理不相應故此二於境明昧異故由斯此品要得成佛依無漏根方容現起而數間斷作意起故

音以十地下明所依根非無漏故顯非因

義中轉義眼等下清涼釋曰言不共者謂眼根唯為眼識依故言必俱者是俱有依根識同時故言同境者即同境依根識共同

緣一境故此三名異俱是五根皆三依中

俱有依攝所依眼等既是有漏故不能發無漏識智此二於境有明昧者二即是漏及與無漏無漏識取境明有漏識取境昧十地五識既是有漏故至佛果方成所依由斯下結申正釋而數間斷作意起者謂雖於佛果已成無漏然數間斷必假作意緣力方得生起非如餘智相續無間

○次總簡

此四種性雖皆本有而要熏發方得現行因位漸增佛果圓滿不增不減盡未來際但從種生不熏成種勿前佛德勝後佛故

音問曰此四智品皆從本有無漏種生若起現行應一切時均成無漏天何得有前後因果轉依之不一耶釋云此四種等意

明雖皆本有要熏乃發熏有勝劣故因位漸增果位圓滿既圓滿已不增不減盡未來際又問何以佛位不增減耶答云但從種生不熏成種故若更熏種則前佛熏多似優後佛熏少似劣故云勿前佛德勝後佛故

○三緣境門^四 初大圓鏡智^二 初師但緣真如

大圓鏡智相應心品有義但緣真如為境是無分別非後得智行相所緣不可知故

○次師緣一切法

有義此品緣一切法莊嚴論說大圓鏡智於一切境不愚迷故佛地經說如來鏡智諸處境識眾像現故又此決定緣無漏種及身土等諸影像故行緣微細說不可知如何賴耶

誠九

二十

亦緣俗故緣真如故是無分別緣餘境故後得智攝其體是一隨用分二了俗由證真故說為後得餘一分二準此應知

^{音義}先標通緣一切諸法莊嚴下引證先引

聖教又此下次引正理謂昔因中既緣種及身器於今果位亦應緣無漏種及身土等故行緣下通前所因謂賴耶緣俗名不可知此亦應爾名不可知緣真如下釋通本後二攝了俗由證真故說為後得者謂能了俗之智是根本智證真如之後而得

誠九

三十一

者故說了俗名後得智意顯此智能證真如必有了俗之後得故餘一分二準此應知者例後平妙二智一體分二意亦均此^{補遺}問二智既是一體起無前後何名後得答由證真故有根本由了俗故有後得了

俗必由證真故假立前後

○二平等性智 三初師但緣第八

平等性智相應心品有義但緣第八淨識如
染第七緣藏識故

○次師但緣真如

有義但緣真如為境緣一切法平等性故

○三師徧緣真俗

有義徧緣真俗為境佛地經說平等性智證
得十種平等性故莊嚴論說緣諸有情自他
平等隨他勝解示現無邊佛影像故由斯此
品通緣真俗二智所攝於理無違

音義通緣真俗乃為盡理佛地下證成十種

平等性者文見第四卷中由斯下結示

○三妙觀察智

妙觀察智相應心品緣一切法自相共相皆

無障礙二智所攝

○四成所作智 二初師但緣五種現境

成所作智相應心品有義但緣五種現境莊
嚴論說如來五根一一皆於五境轉故

補遺前三依心根故二智俱通此智但依色

根而數間斷作意起故故唯後得所謂變
相觀空唯後得問謂之後得者根本而後
生前五既無根本何有後得答是彼類故
同達彼故

○次師徧緣三世諸法

藏九

三三

有義此品亦能徧緣三世諸法不違正理佛
地經說成所作智起作三業諸變化事決擇
有情心行差別領受去來現在等義若不徧
緣無此能故然此心品隨意樂力或緣一法
或二或多且說五根於五境轉不言唯爾故

不相違隨作意生緣事相境起化業故後得智攝

義 先明徧緣三世佛地下引經釋成然此下通前引論並可意知隨作意下釋唯後得不同前三通二智攝

○四作用門 初承前標後

此四心品雖皆徧能緣一切法而用有異

○次釋四用別

謂鏡智品現自受用身淨土相持無漏種平等智品現他受用身淨土相成事智品能現變化身及土相觀察智品觀察自他功能過失雨大法雨破諸疑網利樂有情

補 會玄引百法鈔云大圓鏡智攝自受用身以含持種子親變根身為衆色心總所依故平等性智攝他受用身反因立號觀

疏九

三三

自他平等現十平等身行相勝故妙觀察智能觀諸法自共相故於淨穢二土說法斷疑最爲殊勝二身皆攝若成所作智攝變化身謂即此智徧能成就昔時所作利他願故現三種化身義爲勝故

○次結廣

如是等門差別多種

○次結示

此四心品名所生得

合 謂四智總名菩提此結所生得也

○三結示

此所生得總名菩提及前涅槃名所轉得

合 此以所生菩提所顯涅槃總結所轉得也

補 大乘法師云理疑本有出縛而號涅槃

智照新生果圓而稱正覺乃四德之鴻源

三明之妙本也

○三簡示

雖轉依義總有四種而今但取二所轉得頌
說證得轉依言故

合此約頌所簡四轉依義中唯是後一即

所轉得以所轉得中具菩提涅槃故言二
即轉依義別中之結章也

○三簡示

此修習位說能證得非已證得因位攝故

補遺謂此中明轉依果正說修習位能證得

非已證得是因位攝故此廣釋頌義之第
三科簡示也

成唯識論音響補遺卷第十之二

音釋

環

丑林切
音縣
慢也
五到切
穢於廢切
惡也汚也

傲

慢也

穢

於廢切
惡也汚也

成唯識論音響補遺卷第十之三 誠十

清武林蓮居紹覺大師音義

新伊大師合響

法嗣智素補遺

○五究竟位 三 初末論設問

誠十

後究竟位其相云何

○次舉本頌答

頌曰

此即無漏界 不思議善常 安樂解脫身

大牟尼名法

○三末論釋成 三 初指前標相

論曰前修習位所得轉依應知即是究竟位相

○次正釋頌文 三 初釋第一句 二 初正釋

此謂此前二轉依果即是究竟無漏界攝諸

漏永盡非漏隨增性淨圓明故名無漏界是

藏義此中含容無邊希有大功德故或是因

義能生五乘世出世間利樂事故

音 清涼釋曰諸漏永盡者此即離彼相應

縛義 煩惱是心所起必托於心 非漏隨增

者此即顯離所緣縛義 宗鏡云心心所法皆能緣境境不離

繫名所 緣縛 性淨簡異二乘無學有所知障不

名淨故圓明簡彼十地菩薩未圓滿故具

此諸義名無漏界餘義可知

○次釋妨 二 初釋四智唯無漏妨 初問

清淨法界可唯無漏攝四智心品如何唯無

漏

音 問意云清淨法界有佛無佛性相常住

可言唯無漏攝四智菩提從種生故有為

無漏何得亦唯無漏攝耶

○次答

道諦攝故唯無漏攝謂佛功德及身土等皆是無漏種性所生有漏法種已永捨故雖有示現作生死身業煩惱等似苦集諦而實無漏道諦所攝

○次答

道諦攝故唯無漏攝謂佛功德及身土等皆是無漏種性所生有漏法種已永捨故雖有示現作生死身業煩惱等似苦集諦而實無漏道諦所攝

有示現等

○次釋佛應無五根等妨二初問

集論等說十五界等唯是有漏如來豈無五根五識五外界等

音義 躡前問曰若佛功德身土等皆唯無漏

義十

攝者如何集論等說除後三界餘十五界

唯是有漏豈如來無五根等耶

○次答二初有二師明如來根識等非蘊處界攝二初初師

有義如來功德身土甚深微妙非有非無離諸分別絕諸戲論非界處等法門所攝故與彼說理不相違

音義 初解可知然非正義

○次次師二初釋義

有義如來五根五境妙定生故法界色攝非

義十

三

佛五識雖依此變然麤細異非五境攝如來五識非五識界經說佛心恒在定故論說五識性散亂故

音義 謂如來五根五境屬法界攝以從首楞嚴等諸三昧生故此明根境二五非界處

等攝也非佛下復通妨難問曰如來五塵
言法界攝此或可然降佛已還有情五識
必藉如來法界五塵爲質變相而緣此所
託質寧非五外界所攝耶釋曰非佛五識
雖依此變而所變者麤可言界處等攝爲
質者細豈五境攝如來下明佛五識非識
界攝

○次料簡

成所作智何識相應第六相應起化用故與
觀察智性有何別彼觀諸法自共相等此唯
起化故有差別此二智品應不並生一類二
識不俱起故許不並起於理無違同體用分
俱亦非失或與第七淨識相應依眼等根緣
色等境是平等智作用差別謂淨第七起他
受用身土相者平等品攝起變化者成事品

攝豈不此品攝五識得非轉彼得體即是彼
如轉生死言得涅槃不可涅槃同生死攝是
故於此不應爲難

音義前後問答共有五番成所作智何識相
應者問也意謂如來五識若非五識界攝
者則所轉成智謂與何淨識俱起耶答曰
第六識相應者意云由第六識觀機能起
三類分身之化用故若爾與觀察智體有
何別答云彼觀諸法自共相此唯起化用
即差別義既爾觀察成智應不並生若並
生者於一類識同時起二不應理故許不
下答意可知或與第七下又作一意答前
問謂成所作智或可與第七淨識俱依根
五識綠色等境是平等智作用差別故謂
平等智起他受用身有成事智品亦緣色

等故若爾與平等智性有何別謂平等智起他受用身土成智起變化身土故有差別豈不下復設問曰成事智品如應攝在五識之中豈不得耶非轉下答非謂轉彼五識得此智品其體即是彼所攝復舉例云如轉生死等此解亦未盡理

疏十

○次第三師明如來身土等亦蘊處界攝
四 初正立義

有義如來功德身土如應攝在蘊處界中彼三皆通有漏無漏

音 義謂如來四智功德等法屬蘊處界攝者

如其所應攝在三科之中何以故爾彼三皆通漏無漏故異生蘊等純有漏菩薩蘊等通漏無漏佛果蘊等純無漏謂餘所成者通漏無漏佛所成者純無漏故

疏十

五

○二會相違 二 初會集論

集論等說十五界等唯有漏者彼依二乘麤淺境說非說一切謂餘成就十八界中唯有後三通無漏攝佛成就者雖皆無漏而非二乘所知境攝

音 初句牒前引論彼依下次會通謂彼集

論依二乘麤淺境說境既粗淺能緣根識亦粗淺故說唯有漏不依如來微妙境說故云非說一切謂餘下轉釋餘謂九界有情後三即意根法境及意識

○次會餘處

然餘處說佛功德等非界等者不同二乘劣智所知界等相故理必應爾所以者何說有為法皆蘊攝故說一切法界處攝故十九界等聖所遮故

音義有聖教云佛功德等非界等攝者譯此勝境而非二乘劣智所知境故所以言非界等所攝以理而言如應攝在蘊處界中所以者何佛功德等屬有爲故經說有爲皆蘊攝故又說諸法界處攝故若謂非十八界等攝者應是十九界十三處六蘊攝故十九界等聖所遮故

○三斥前師

若絕戲論便非界等亦不應說即無漏界善常安樂解脫身等又處處說轉無常蘊獲得常蘊界處亦然寧說如來非蘊處界故言非者是密意說又說五識性散亂者說餘成者非佛所成

音義先以本頌斥初解非又處處下復引他處通斥前二家解如經云憍陳如因滅無

常色而獲常色受想行識亦復如是又論說五識性散亂者說餘九界非佛所成故不相違

○四結正釋

故佛身中十八界等皆悉具足而純無漏

○次釋第二句 三初釋不思議

此轉依果又不思議超過尋思言議道故微妙甚深自內證故非諸世間喻所喻故

音義此以三義釋不思議三字意可思准

○次釋善字 二初正釋

此又是善白法性故清淨法界遠離生滅極安隱故四智心品妙用無方極巧便故二種皆有順益相故違不善故俱說爲善

音義善者白淨義謂二轉依是純淨故離染黑故名之曰善善者順益義清淨法界遠

離生滅解脫諸苦極安隱故四智心品妙用無方澤彼羣生極巧便故二種皆有順益義故違不善法違損義故俱說爲善

○次釋妨二初問

論說處等不唯無記如來豈無五根三境

音義難者意謂論說十二處中五根與香味

觸性唯無記餘通三性故云不唯無記而上章言佛四智等唯是善攝豈如來身無五色根及香味觸之八處耶

○次答

此中三釋廣說如前一切如來身土等法皆滅道攝故唯是善聖說滅道唯善性故說佛土等非苦集故佛識所變有漏不善無記相等皆從無漏善種所生無漏善攝

音義謂此中亦同前有絕戲論故妙定生故

非根境攝及如應有根境等三師解釋若申第三師正義者應云論說五根三境唯無記者彼依餘成就者說非佛所成故佛身中十二處等皆悉具足而純善性一切下復明唯善竝可如文准知

○三釋常字

此又是常無盡期故清淨法界無生無滅性無變易故說爲常四智心品所依常故無斷盡故亦說爲常非自性常從因生故生者歸滅一向說故不見色心非無常故然四智品由本願力所化有情無盡期故窮未來際無斷無盡

音義此以無盡期釋二果常義先標清淨下別明涅槃自性無生滅無變易故有常義四智雖非自性無生滅以所依法界是常

而能依四智亦說爲常非自性下釋四智
非自性常義然四智下釋四智自性亦有
常義

○三釋後二句二初釋安樂二字

此又安樂無逼惱故清淨法界衆相寂靜故
名安樂四智心品永離體害故名安樂此二
自性皆無逼惱及能安樂一切有情故二轉
依俱名安樂

音義斯以無逼惱釋二果安樂義先標清淨
下別明永離體害者謂所知障是智體害
今既圓明故言永離此二下結可知

○次釋解脫等八字二初釋解脫身三字
二乘所得二轉依果唯永遠離煩惱障縛無
殊勝法故恒名解脫身

音義解脫身者攝論曰唯永遠離煩惱障縛

如卽邑人離械鎖等所有禁繫息除衆苦
而無殊勝增上自在富樂相應

○次釋大牟尼名法二初略明頌義

大覺世尊成就無上寂默法故名大牟尼此
牟尼尊所得二果永離二障亦名法身無量
無邊力無畏等大功德法所莊嚴故體依聚
義總說名身故此法身五法爲性非淨法界
獨名法身二轉依果皆此攝故

音義梵音牟尼此云寂默永寂二邊默契中
道二果亦名法身者法謂諸功德等身者
九體義依義聚義此法身五法爲性者此以
聚義釋法身也佛地經云清淨真如及四
智品名爲五法以清淨法界名爲涅槃四
智心品名爲菩提合此二種名爲法身不
獨一種清淨法界名法身也以二轉依攝

此五法五法皆是法身攝故

補遺起信筆削記卷第五云身具三義一者

體義真如自體任持不失故二者依義爲彼報應之所依故三者聚義一切功德之所集故

○次廣解法身三初明能依身四初正釋

三身二初總標

如是法身有三相別

合攝大乘論第一卷云若無自性身應無

法身譬如眼根若無法身應無受用身譬

如眼識應知此中所依能依爲同法喻若

無受用身已入大地諸菩薩衆應無受用

法樂菩提資糧應不圓滿譬如見色若無

化身勝解行地諸菩薩衆諸聲聞等劣勝

解者最初發趣皆不應有是故決定應有

三身文

○次別釋三初自性身

一自性身謂諸如來真淨法界受用變化平等所依離相寂然絕諸戲論具無邊際真常功德是一切法平等實性即此自性亦名法身大功德法所依止故

音受用變化平等所依者此以能依顯所

依勝也前文約聚義名身故以五法名法

身此中以能依顯所依約依義名

身又真淨法界離相寂然絕前章通立二

諸戲論是以體義名法身也

十

果亦名法身此中唯以法界自性名法身

者以後二身即菩提果故應知前後但是

開合立名所以標中言如是法身有三相

別即開意也然此自性於三身中又得法

身之通稱故云亦名法身大功德法所依止者此以依義釋法身也

合 開蒙引普潤大師云軌持爲法依止名

身憑何以知光明疏云法名可軌諸佛軌之而得成佛摩訶衍云湛湛絕慮寂寂名斷能爲色相作所依止憑此而知問寂寂名斷安曰法身答法實無名爲機詮辯召寂寂體強稱法身問湛湛之體當同虛空答凡所有相皆是非相覺五音如谷響如實無聲了萬物如夢形見皆非色空有不二中道昭然不可聞無謂空斷絕

文

○次受用身 三 初標

二受用身此有二種

○次釋 二 初自受用

一自受用謂諸如來三無數劫修習無量福慧資糧所起無邊真實功德及極圓淨常徧色身相續湛然盡未來際恒自受用廣大法

誠十

十一

樂

音 謂諸如來於三阿僧祇劫中修習福智之所引生本有無漏種子所起現行四智功德及鏡智所起圓滿清淨常徧色身總名目受用身

合 開蒙問何義故名爲報身答三無數劫修所得故名爲報身唯此是實後皆應身普潤云報謂果報三祇修因所得果故身者依止相續二義名身問依止義答有爲功德所依止故問相續義答盡未來際無斷盡故問其果報者何教所明答摩訶衍云具勝妙因受極樂果遠離苦相故名爲報問依止相續義何所出答唯識論云所起無邊真實功德相續湛然盡未來際此其出也

○次他受用

二他受用謂諸如來由平等智示現微妙淨功德身居純淨土爲住十地諸菩薩衆現大神通轉正法輪決衆疑網令彼受用大乘法樂

音此由證自受用故爲欲利他十地菩薩義
於平等智中之所現者名他受用如華嚴之舍那身是也

○三結

合此二種名受用身

○三變化身

三變化身謂諸如來由成事智變現無量隨類化身居淨穢土爲未登地諸菩薩衆二乘異生稱彼機宜現通說法令各獲得諸利樂事

音義變化身者亦由證自受用故爲欲利他

賢位菩薩及二乘與六道異生於成事智中現隨類身隨彼機宜演說三乘及人天因果令彼各得世出世間諸利樂事名變化身攝論曰變化身者從觀史多天宮現殺受生受欲踰城出家往外道所修諸苦行證大菩提轉大法輪入大涅槃故

合開蒙問變化身答無而歛有謂之變化

聚化五蘊名之爲身問化身數類答有三類一大化身二小化身三隨類化問大化

身答千丈大化王大千界被地十二前機問小

化身答丈六金身王一四天下二乘凡夫

是所被機問隨類化答猿中現猿鹿中現鹿名隨類化問拘尸羅現三尺身城東老母指掌所現此當何類答據被人類屬小

化身據非丈六屬隨類化文

○二五法相攝二初標

以五法性攝三身者

○次釋二初初師

有義初二攝自性身經說真如是法身故論

說十

十三

說轉去阿賴耶識得自性身圓鏡智品轉去

藏識而證得故中二智品攝受用身說平等

智於純淨土為諸菩薩現佛身故說觀察智

大集會中說法斷疑現自在故說轉諸轉識

待受用身故後一智品攝變化身說成事智

於十方土現無量種難思化故又智殊勝具

攝三身故知三身皆有實智

音初二攝自性身者謂五法中一真法界

及圓鏡智攝三身中自性身經說下引證

經說真如是法身者此證一真法界攝自

性身論說轉去阿賴耶等二句者此證圓

智攝自性身中二智品攝受用身者謂五

法中平妙二智攝三身中受用身說平下

引證如文後一智品攝變化身者謂五法

中成事智品攝三身中變化身說成下引

證又智下復以四智總攝三身故結云三

身皆有實智言智殊勝者佛地經云又佛

三身皆十義中智殊勝攝

○次次師二初明一真如攝自性身二初

正釋

有義初一攝自性身說自性身本性常故說

佛法身無生滅故說證因得非生因故又說

法身諸佛共有徧一切法猶若虛空無相無

為非色心故

音謂五法中一真法界攝三身中自性身

何以鏡智不攝自性謂鏡智品非本性常故有生滅故是生因之所生故是有相有爲色心法故自性反是故不相攝

○次通論

然說轉去藏識得者謂由轉滅第八識中二

障麤重顯法身故智殊勝中說法身者是彼

義十

十四

依止彼實性故自性法身雖有真實無邊功德而無爲故不可說爲色心等物

音初句牒前引論謂由下次通論意云由

轉本識中二障種子顯法性身非同鏡智

轉去彼識而證得者故不可以鏡智亦攝

自性身也智殊下次通前釋先牒是彼下

次通謂法身是彼四智之依止是彼四智

之實性故言具攝三身理實不攝法身唯

攝後二身故自性下出不攝法身之意謂

自性雖具無邊功德而是無爲法故不可爲鏡智色心所攝

○次明後四法攝餘二身二初正釋二初

通明智攝二身

四智品中真實功德鏡智所起常徧色身攝

自受用平等智品所現佛身攝他受用成事

智品所現隨類種種身相攝變化身

音謂通以四智及鏡智所現色身攝自受

用平等成事二智所現如應攝餘二身

○次轉釋自受用身

義十

十五

說圓鏡智是受用佛轉諸轉識得受用故雖

轉藏識亦得受用然說轉彼顯法身故於得

受用略不說之又說法身無生無滅唯證因

得非色心等圓鏡智品與此相違若非受用

屬何身攝又受用身攝佛不共有爲實德故

四智品實有色心皆受用攝

音義問曰何由而知四智功德攝自受用耶

釋曰說圓鏡智等又問轉去藏識亦得自受用身何以不言釋云雖轉藏識等應知轉藏識有二義別一者轉滅識中二障種

子顯現法身二者轉染識體成大圓鏡得自受用今此但說顯法身義而於轉染成淨一義略不言之又說下以理推明圓智定屬自受用攝唯證因得者唯是清淨聖智之所證故又受用身通攝佛地不共有為功德故自受用攝彼四智故四下結示

○次斥前二初正斥

又他受用及變化身皆為化他方便示現故不可說實智為體雖說化身智殊勝攝而似智現或智所起假說智名體實非智但說平

等成所作智能現受用三業化身不說二身即是二智故此二智自受用攝

音義前師云三身皆有實智此中斥云他受用及變化等復有問曰聖教說變化身智殊勝攝何非實智故今釋云雖說化身等又問聖說二身即是二智所現何得體非實智故復釋云但說平等

○次釋疑

然變化身及他受用雖無真實心及心所而有化現心心所法無上覺者神力難思故能

識十

其

化現無形質法若不爾者云何如來起貪瞋等久已斷故云何聲聞及傍生等知如來心如來實心等覺菩薩尚不知故由此經說化無量類皆令有心又說如來成所作智化作三業又說變化有依他心依他實心相分現

故雖說變化無根心等而依餘說不依如來又化色根心心所法無根等用故不說有

首問曰若他受用及與變化而非實智爲

體者大似土偶人無異何能說法利生耶釋曰然變化等復問身等有質可言化現

心等無形豈能化現耶釋云無上覺等若

不爾下反釋能現謂若如來不能化現心

及心所無形質法則如來貪瞋等久已斷

故云何能現如來實心等覺菩薩尚不能

知云何聲聞及傍生等能知佛心故知聲

聞等能知者即化現故如有經云諸天亦

知佛心如佛一時深擯衆僧還念欲取梵

王悉知又於一時心念爲王如法化世魔

王即知而來勸請又諸比丘亦知佛心如

佛將泥洹時阿那律陀次第知佛所入諸

滅十

十七

禪三昧其類實繁不能枚舉由此下引證

化無量類皆令有心者涅槃經說入天百

萬設最後供唯純陀供是佛親受餘悉化

人此化人者皆似有心令彼人天各各自

謂佛受我供故餘文可思錯說下通妨問

既變化身有根心云何他處說無根心答

雖說變化無根心等此依二乘劣定所起

根心是聲聞等所現化人不依如來實智

所起根心又彼劣定所化根心無真實受

用故論不說有化根心

○三三身德別

如是三身雖皆具足無邊功德而各有異謂

自性身唯有真實常樂我淨離諸雜染衆善

所依無爲功德無色心等差別相用自受用

身具無量種妙色心等真實功德若他受用

及變化身唯具無邊似色心等利樂他用化相功德

合先標謂自性下別釋謂本性常故有常

德白法善故有淨德寂靜安隱故有樂德

解脫離縛故有我德性淨圓明故名離諸

雜染含容衆德故名衆善所依自受用身

等者即圓鏡智所起常徧色身及四智品

眞常功德餘二身可知

○四自他利殊

又自性身正自利攝寂靜安樂無動作故亦

兼利他爲增上緣令諸有情得利樂故又與

受用及變化身爲所依止故俱利攝自受用

身唯屬自利若他受用及變化身唯屬利他

爲他現故

音義爲增上緣者謂諸佛自性身即法界理

義十

十八

此理徧一切法及有情心以故有情發心修行皆藉此而爲內因令其所作咸悉成就故云爲增上緣令諸有情得利樂故

○次明所依土四初法性土

又自性身依法性土雖此身土體無差別而

屢佛法相性異故此佛身土俱非色攝雖不

可說形量小大然隨事相其量無邊譬如虛

空徧一切處

音准古疏云佛義是相爲功德法所依止

故衆德聚故二身自體故法是性義功德

自性故能持自性故諸法自性故體爲土

義相義爲身意云屬佛是相屬法是性直

語所依名土故云體爲土義以能依名所

依爲法性身故云相義爲身言隨事相其

量無邊者以變化等三身三土事既無邊

與之爲性豈有邊耶

合響開蒙問唯一法性寧分身土答能依義

邊名之爲身所依義邊名之爲土文宗鏡

第八十九卷云此即於自心性相分身土

之名以自心相義名身自心性義名土文

疏

十九

○二自受用土

自受用身還依自土謂圓鏡智相應淨識由

昔所修自利無漏純淨佛土因緣成熟從初

成佛盡未來際相續變爲純淨佛土周圍無

際衆寶莊嚴自受用身常依而住如淨土量

身量亦爾諸根相好一一無邊無限善根所

引生故功德智慧既非色法雖不可說形量

大小而依所證及所依身亦可說言徧一切

處

音義先明土量純淨佛土因緣者即菩提分

法等謂淨第八所變自受用土由昔所修

自利無漏淨土因緣之所出生衆寶莊嚴

周徧圓滿無有涯際如淨土下次例身量

如起信論云身有無量色色有無量相相

有無量好所住依果亦有無量種種莊嚴

隨所示現即有無邊不可窮盡皆是無量

劫來無量善根所引生故功德下例同功

德智慧所證謂二空真如所依謂自性法

身也清涼云功德隨所依身智慧隨所依土

合響開蒙問報身體答四智菩提無漏五蘊

問報土體答無漏色蘊問能所依答根根

塵塵徧周沙界情器有異情爲能依屬報

身器爲所依屬報土此實報土

○三他受用土

他受用身亦依自土謂平等智大慈悲力由

昔所修利他無漏純淨佛土因緣成熟隨住
十地菩薩所宜變爲淨土或小或大或劣或
勝前後改轉他受用身依之而住能依身量
亦無定限

音義利他無漏純淨佛土因緣者如淨名經

云直心是道場菩薩成佛時不詣衆生來
生其國等或小大勝劣等者謂初地所見
淨土望於二地爲小爲劣展轉乃至第九
地望於法雲爲小爲劣等爲大爲勝反是
可知

○四變化土

若變化身依變化土謂成事智大慈悲力由
昔所修利他無漏淨穢佛土因緣成熟隨未
登地有情所宜變爲佛土或淨或穢或小或
大前後改轉佛變化身依之而住能依身量

第十

十

亦無定限

音義利他無漏淨穢因緣者應知佛所修因

無非淨行寧有穢土成熟之理良以衆生
根性有殊或宜順導者則現淨土而攝受
之應逆化者則現穢土而折伏之以故彌

陀現居淨土釋迦示生堪忍如有經云菩

薩隨所化衆生而取佛土即斯義也淨穢

大小前後改轉者淨如螺髻梵王見此佛

土無非七寶穢如身子所見唯瓦礫荆棘

等大小例知能依身量亦無定限者由機

第十

十

不一故或見千丈或唯丈六乃至或有見

佛只三尺等

○三身土合簡二初別約諸佛分簡身土

有同不同三初自性身土

自性身土一切如來同所證故體無差別

合 清涼疏云自性身土一向體同鈔云既

同所證明是體同如一室之空文

○次自受用身土

自受用身及所依土雖一切佛各變不同而皆無邊不相障礙

合 清涼疏云自受用者平等無二相似名

同鈔云如千燈光同照室內文

○三餘二身土二初標

餘二身土隨諸如來所化有情有共不共

合 清涼疏云餘二身土亦相似名同而隨

機見異鈔云有共不共者共爲異故名共

非是同義不共隨化別故上二皆異然共

不共亦相似名同令其各見共不共差即

隨機見異文

○次釋

所化共者同處同時諸佛各變爲身爲土形狀相似不相障礙展轉相雜爲增上緣令所化生自識變現謂於一土有一佛身爲現神通說法饒益於不共者唯一佛變諸有情類無始時來種性法爾更相繫屬或多屬一或一屬多故所化生有共不共不爾多佛久住世間各事劬勞實爲無益一佛能益一切生故

音 清涼釋曰於中三初釋共義佛各變者

如今釋迦化身若一類衆生昔與阿閼彌

陀藥師寶集皆悉有緣應受其化所化之

者身不可分在賢劫時閻浮之處則阿閼

如來化一佛身爲釋迦文阿彌陀佛亦化

一身爲釋迦文藥師琉璃光亦化一身爲

釋迦文寶集如來亦化一身爲釋迦文同

在迦毘菩提樹下一時成佛令諸衆生但謂一釋迦文佛如五盞燈同照一物共發一影實有多光名發一影而相雜故謂之爲一如其一人屬於五佛如上所明若百千人同屬五佛亦如是見五佛爲一於不

藏十

主

共下二釋不共設見十方百千化佛亦是一佛化現諸身耳諸有情類下第三雙結釋成就上來共不共義或多屬一或一屬多者然應更有或多屬多或一屬一文無者略不爾下彈餘師義然攝論中有三師義一云共一一皆度一切等故一云不共以類本來相屬別故如慈氏釋迦同事底沙佛佛見釋迦所化先熟爲之入定令其七日忘下一足一偈讚佛超於彌勒九劫先成豈非別耶三云有共不共若一向共

藏十

三三

何用多佛若一向不共不應歷事多佛願度一切不應以已所化衆生付囑後佛今唯識論即第三正義略彈共家不彈不共○次通約生佛合簡身土所變不同一初約漏等判屬四諦二初明無漏識變者道諦攝

此諸身土若淨若穢無漏識上所變現者同能變識俱善無漏純善無漏因緣所生是道諦攝非苦集故蘊等識相不必皆同三法因緣雜引生故

音義謂上四種身土約佛無漏識上所變現者同乎能變俱純無漏何者是善無漏共不共等種子生故蘊等下通伏疑云謂如能變是無漏故所變身土亦無漏則能變是識所變亦應唯是識相無蘊等之別

耶故釋云蘊等識相等意云能變雖是識所變蘊等從能變識起總皆識相不必皆同以從蘊處界三種引生故

補遺宗鏡云所變身土若第八識中從種子變生四塵五塵現行者名因緣變佛唯無漏若六七識變名分別變佛唯無漏

○次明有漏識變者苦集攝

有漏識上所變現者同能變識皆是有漏純從有漏因緣所生是苦集攝非滅道故善等識相不必皆同三性因緣雜引生故蘊等同

異類此應知不爾應無五十二等

音義此諸身土若約九界有情有漏第八識上託佛身土爲質所變親相分者同能變識皆是有漏何者純從有漏種所生故善等下問曰若能變是有漏所變亦是有漏

則能變識性は無記則所變亦應唯は無記性耶故釋云善等識相等意云能變雖是無記所變善等不必皆同無記識相以從識中三性種子雜引生故蘊等同異類此應知者應云蘊等識相不必皆同三性因緣雜引生故若言不爾應無五蘊十二處等

○次約三性別示五觀 五初示遣虛存實

觀 一初安慧立相見爲虛自證爲實

然相分等依識變現非如識性依他中實不

識十

二五

爾唯識理應不成許識內境俱實有故

音義此師意以相見二分爲徧計所執自證分識性爲依他起依他起法從因緣生固是唯識徧計所執是虛妄起故云非如識性依他中實不爾下謂若相分等亦是依

他中實則許實有內境唯識之理何由成耶此安慧所立非正義

○次以護法立徧計爲虛四分俱實或識相見等從緣生俱依他起虛實如識唯言遣外不遮內境不爾真如亦應非實

誠十

五

音此師正義謂相等四分俱依他起虛實如識者依真勝義言識如幻夢則所變相分亦虛約世俗諦言依他不無則相見分亦是實有若爾則有實境耶故釋云唯言遣外不遮內境如不然者本智所緣真如

內境亦應非實

○二示捨濫留純觀二初問

內境與識既並非虛如何但言唯識非境

音意云境識既並非虛是則論家應云識唯境如何但言唯識而非境耶

○次答

唯識內有境亦通外恐濫外故但言唯識或諸愚夫迷執於境起煩惱業生死沉淪不解觀心勤求出離哀愍彼故說唯識言令自觀心解脫生死非謂內境如外都無

音謂識唯內有境通內外謂境雖是內識所變外人妄計心外有法若言唯境恐濫外計所以但言唯有識耳或諸下又一義釋謂諸愚夫迷執外境起三雜染不解觀心解脫生死哀愍彼故但言唯識非謂亦無內境

○三示攝末歸本觀

或相分等皆識爲性由熏習力似多分生

音謂相見分亦識爲體由熏習力似二分生若攝末歸本唯一自證分耳

○四示遣相證性觀

真如亦是識之實性故除識性無別有法

音義問八識四分是妙俗諦可言唯識真如

乃廢詮談旨豈亦唯識耶故釋云真如亦即識之實性故除識外無別有法

○五示隱劣顯勝觀

此中識言亦說心所心與心所定相應故

音義問既言唯識何故又有五十一心所法

故釋曰此中識言等

補遺宗鏡第三十五卷云唯識二觀者一唯

心識觀二真如實觀進趣大乘方便經云

若依一實境界修信解者應當學習二種

觀道一唯心識觀二真如實觀學唯心識

觀者所謂於一切時一切處隨身口意所

有作業悉當觀察知唯是心乃至一切境

誠十

二十六

界若心往念皆當察知勿令使心無記攀

緣不自覺知於念念間悉應觀察隨心所

有緣念當使心隨逐彼念令心自知知已

內心自生想念非一切境界有念有分別

也所謂內心自生長短好惡是非得失衰

利有無等見無量諸想而一切境界未嘗

有想起於分別當知一切境界自無分別

想故即自非長非短非好非惡乃至非有

非無離一切相如是觀察一切法唯心想

生若使離心則無一法一相而能自見有

誠七

十七

差別也真如實觀者思唯心性無生無滅

不自見聞覺知永離一切分別之想又三

十六卷云言觀之一字理有二種一觀矚

二觀察初觀矚者如前五識緣五塵境矚

對前境顯現分明無推度故現量性境之

所攝故次觀察者向自識上安模建立伺
察推尋境分劑故今立觀門即當第二觀
察義約能觀之心出體有四一剋性出體
唯別境慧此慧能揀去散亂染無記等擇
留善淨所變境故二能所引體定引慧故
三相應體五蘊除色四眷屬體并色五蘊
問相應四蘊心王心所取其何者爲能觀
察答先辯心王次明心所若八識心王唯
取第六問前五七八俱能緣慮何以不取
答且前五識有漏位中唯現量緣實五塵
境第八唯現量緣三境故種子根身器世
間境性唯無記第七有漏位中常緣第八
見分爲境非量所收今能觀心因教比知
變起相分比量善性獨影境攝故唯第六
有此功能問第六心王有其幾種答義說

有四一明了意識與前五識同緣五塵分
明顯了二定中意識引得上定定中所起
三獨散意識不與前五同緣爲簡明了故
立獨名又非定中所起故名爲散獨於散
位而生起故四夢中意識於睡眠位起此
識故問四中何者爲能觀心答得上定者
定中意識現量觀故未得定者獨散意識
能爲觀體次明心所者有五十一法今明
能觀心但唯善性第六識其相應心所隨
心王說定中心所唯二十一謂徧行五別
境五善十一或尋伺中隨取一法即二十
二尋麤伺細不俱起故淺深推度思慧爲
體若與散位心王相應即二十法於前善
中除輕安故輕安一法是定引故有定資
身方得調暢有輕安義或二十一於尋伺

中隨取一故問能觀心於三境之中此何境答定散二位皆獨影境變假相故此假相分從能緣見分種生自無其種故名獨影言獨影自有二類一有質即此觀心托彼爲質二無質緣龜毛等問定散二位托彼質緣熏得何種答唯熏能觀心心所見分種子相分是假不熏有漏觀心不熏無漏質種問三量之中此是何量答定位現量收散位比量攝不通非量非正觀故問三性何性答唯善性故

○第三釋結施願分二初結示題名

此論三分成立唯識是故說爲成唯識論亦說此論名淨唯識顯唯識理極明淨故此本論名唯識三十由三十頌顯唯識理乃得圓滿非增減故

誠十

二十九

音義先結末論名曰成唯識者謂以宗因喻等三支成立唯識理故復說此名淨唯識者顯理究竟極明淨故次出本論名曰唯識三十頌者由三十頌顯唯識理自因至果乃得圓滿義無增減故

○次結歸施願

已依聖教及正理 分別唯識性相義
所獲功德施羣生 願共速登無上覺
音義初二句結歸次二句施願
成唯識論音響補遺卷十之三

音釋

削 息約切 剗也 歛 許物切 忽也 螺髻 上盧戈切 下古詣切 礫 郎狄切 矚 朱欲切 視也